

Pengguna Perlu Fahami Hakikat Tentang Subsidi

Wawancara **Siasah**
bersama
Datuk Marimuthu Nadason
Presiden FOMCA

ISBN 978-983-40315-9-6

Gabungan Persatuan-Persatuan
Pengguna-Pengguna Malaysia (FOMCA)
No. 1D-1, Bangunan SKPPK
Jalan SS9A/17
47300 Petaling Jaya
Selangor Darul Ehsan
MALAYSIA

© FOMCA 2008

Cetakan Pertama - Jan 2008

Pengguna Perlu Fahami Hakikat Tentang Subsidi

~~~~~

Sejak akhir-akhir ini pelbagai isu berkaitan dengan kepenggunaan telah ditimbulkan. Bukan sahaja kenaikan harga barangan dapur sejurus berlakunya kenaikan gaji kakitangan awam, tetapi juga kenaikan harga ayam yang tidak menentu menjelang Ramadan dan pada sambutan Hari Raya.

Wartawan Siasah, Kalsum Ahmad cuba mendapatkan penjelasan lebih mendalam mengenai isu-isu tersebut daripada Presiden Gabungan Persatuan-Persatuan Pengguna-Pengguna Malaysia (FOMCA), Datuk Marimuthu Nadason.

Dua isu besar melibatkan ura-ura kenaikan harga minyak dan TOL turut dibicarakan oleh Marimuthu dalam wawancara khas dengan beliau.

**SIASAH:** *Ada ura-ura mengatakan harga minyak akan naik lagi tahun hadapan. Dalam hal ini, bagaimana maklumat yang diperolehi oleh FOMCA?*

**DATUK MARIMUTHU NADASON:** Pertama kita kena faham, harga minyak ditentukan oleh pasaran antarabangsa. Itu hakikat. Dan kita juga kena lihat di seluruh dunia seperti di Britain, India, Indonesia, apabila harga minyak naik, harga minyak di situ juga perlu dinaikkan dan bila harga turun, ia diturunkan. Itu hakikat.

Tetapi di negara kita, kita kena faham kerana subsidi yang terlalu tinggi yang diberikan oleh kerajaan sehingga berbilion, maka kerajaan tidak boleh

tanggung perkara ini terlalu lama. 50 tahun kerajaan sudah menanggung jadi kenaikan 20 sen atau 30 sen pada tahun lepas, kita kena terima hakikat. Contohnya kalau RM1.92 sen seliter, kalau dibuka pada pasaran bebas, mungkin boleh sampai sehingga RM4.00 seliter. Jadi kita kena faham, sekarang ini kita masih termurah di dunia kerana subsidi.

Persoalan kita sekarang ialah, sebagai seorang rakyat Malaysia yang telah sekian lama menikmati subsidi yang diberikan oleh kerajaan, apa yang boleh kita bantu buat sementara waktu, yang pertama ialah merancang ekonomi kita sendiri dengan mengurangkan penggunaan tenaga misalnya seperti elektrik, air mahupun pengangkutan iaitu kenderaan kita. Kita perlu mengorbankan sedikit aktiviti kita yang menggunakan kuasa tenaga ini.

Kedua kerajaan harus merancang dasar pertanian yang mampan supaya tanah-tanah pertanian yang terbiar sebanyak 800 ribu hektar atau lebih dapat membantu petani-petani kecil dan sederhana ini supaya dapat dipulihkan sektor penanian ini kembali dalam Rancangan Malaysia jangka panjang selama lima hingga enam tahun.

Untuk jangka masa pendek, jangan terlalu banyak sangat membeli barang-barang makanan sebab kita kena faham negara kita hampir RM20 bilion mengimport barang-barang makanan dan ini adalah satu angka yang terlalu tinggi dan kita terlalu mengharapkan sektor ini.

Oleh itu kita berharap sektor pertanian dapat mengurangkan pergantungan ini dan menggunakan apa yang kita ada, dan kerajaan pun harus mendidik atau memberi peluang kepada badan-badan bukan kerajaan untuk membantu kerajaan mendidik rakyat supaya memahami isu ini - krisis minyak agar dapat mengurangkan penggunaan tenaga. Kerajaan juga harus melabur untuk memastikan tenaga alternatif sedia ada di dalam negara ini.

Kita kena faham, semua ini ada kaitan misalnya kenapa kita bagi permit import makanan yang banyak supaya tiada monopoli kerana kalau kita bagi kepada tiga orang yang boleh membawa masuk gula misalnya, mungkin harga boleh dikurangkan. Begitu juga dengan barang-barang lain. Kita perlu ada strategi-strategi seperti ini supaya rakyat dan kerajaan



saling membantu bagi memastikan supaya keadaan ini tidak serius. Kita kena ingat, banyak negara di dunia ini mengalami krisis yang jelas, dan ini bukan isu yang sengaja diadakan dan kita kena terima hakikat.

***Wajarkah harga minyak dinaikkan sedangkan harga minyak baru sahaja dinaikkan 30 sen seliter?***

Harga ini naik pada tahun lepas, bukannya pada tahun ini sebanyak 30 sen dan kerajaan berjanji pada tahun itu walaupun harga minyak di pasaran dunia mungkin naik ia akan memastikan harga minyak pengguna di Malaysia tidak naik. Tetapi ini sudah lama, kita kena realistik dengan kenaikan gaji sebanyak 35%. Dan kalau kerajaan mahu tampung subsidi minyak dengan lebih lagi, apa akan jadi dengan sektor lain, misalnya pembinaan sekolah, untuk kesihatan dan sebagainya. Dalam hal ini kita kena terima hakikat, kita tidak boleh dapat semua secara percuma.

***Apakah alasan yang akan digunakan oleh kerajaan untuk menjustifikasikan harga minyak di pasaran pada tahun akan datang?***

Kerajaan akan memberi apa sahaja alasan yang mungkin digunakan dan kita telah dengar apabila kerajaan menaikkan harga minyak sebanyak 30 sen inilah alasan yang telah digunakan.

***Setiap kali berlaku kenaikan harga minyak, kerajaan akan memberi alasan disebabkan kenaikan minyak di pasaran dunia tetapi bagi FOMCA apakah alasan ini munasabah?***

Memang munasabah sebab kita ada subsidi tetapi kalau di Singapura satu liter lebih kurang RM4. Ia tidak boleh dapat secara percuma. Cuba beritahu saya di negara mana di dunia ini harga minyak diberi subsidi yang menyeluruh. Kita kena terima hakikat dan kita tidak boleh kata sebab kita ada Petronas dan kita boleh gunakan hasilnya. Kita kena faham ekonomi dan sebagai rakyat, cuba kita kurangkan penggunaan bahan api.

*Jadi apa kelebihan negara kita sebagai negara pengeluar minyak kalau negara lain menaikkan harga minyak, negara kita mengikut jejak?*

Kalau penggunaan kita mampan, kita tidak perlu harga benda-benda ini dinaikkan selalu sangat.

*Satu perkara yang menjadi persoalan apabila harga minyak di pasaran dunia naik, harga minyak di negara kita juga turut naik tetapi apabila harga minyak turun seperti berlaku baru-baru ini, negara kita tidak pula menurunkannya?*

Kalau sesiapa mahu harga itu turun, kerajaan kena beri subsidi. Harga kita seliter hanya RM1.92 tetapi kalau di pasaran terbuka lebih kurang RM3 lebih.

*Oleh kerana subsidi, harga kita kurang sedikit?*

Oleh kerana pemberian subsidi oleh kerajaan ini terlalu tinggi, maka kenaikan harga minyak kita tidak terlalu ketara. 20 sen dan 30 sen itu tidaklah dikira naik. Kalau tiada subsidi, sesetengah kereta tidak boleh bergerak.

*Bagaimana pandangan Datuk apabila Petronas untung besar hasil jualan petroleum mentah. Jadi rakyat sepatutnya menikmati kenaikan minyak mentah dan kerajaan tidak perlu membebankan kepada rakyat?*

Itu untuk negara. Misalnya negara Singapura, walaupun ia sebuah negara yang kecil, tetapi dia melabur dengan membeli bangunan di luar negara, ia kutip semua hasil untuk mentadbirkan negara. Begitu juga di negara kita, semua itu adalah untuk keperluan negara, kalau tidak, gaji kakitangan awam siapa yang nak bayar?

***Menurut kenyataan Menteri Kerja Raya baru-baru ini, tol kemungkinan besar akan naik tahun hadapan tetapi Timbalan Perdana Menteri berkata ia masih lagi dalam perbincangan. Apakah FOMCA merasakan tol akan naik lagi?***

FOMCA sudah berjumpa menteri dan kita juga sudah menghantar memorandum, apa-apa kenaikan tol kita harus mengadakan perbincangan terlebih dahulu. Oleh kerana ini adalah ura-ura dan kita tidak mahu apabila mendengar guruh di langit, air tempayan dicurahkan.

***Walaupun ura-ura tetapi menteri sendiri sudah membuat kenyataan?***

Dia memang bercakap tetapi buat masa sekarang belum ada keputusan. Contohnya seperti kenaikan beras, walaupun syarikat mengatakan harga beras sudah naik tetapi akhirnya pihak kerajaan menarik balik. Dalam hal ini kita kena melihat terlebih dahulu sebab terlalu banyak ura-ura yang dibuat.

***Kenaikan tol banyak menimbulkan kontroversi kepada rakyat. Rata-rata rakyat tidak tahu tentang perjanjian yang kerajaan lakukan berkaitan dengan konsesi lebuh raya...***

Dalam hal ini, pihak kita telah beberapa kali menceritakan kepada pihak kerajaan dan terserah kepada pihak awak untuk menceritakan kepada rakyat apa yang terkandung dan sekiranya rakyat ingin tahu, beritahu berapa yang telah dibelanjakan untuk membina lebuh raya. Lebuh raya kita adalah baik, sewaktu hendak menyambut Hari Raya lebuh raya kita sesak dengan kenderaan bukannya seperti di India, 50 kilometer untuk sampai memakan masa lebih kurang empat jam. Kita, 50 kilometer tidak sampai 20 minit sebab jalan raya kita baik. Apabila rakyat tahu apa yang termeterai dalam perjanjian ini, biarlah dia membuat keputusan. Kita tidak boleh semuanya dapat percuma.

***Pernah ke FOMCA membawa isu kenaikan harga tol ini kepada pihak kerajaan?***

Setiap kali naik harga tol kita telah memberi memorandum dan isi memorandum kita adalah jelas supaya kita buka dan beritahu orang apa yang terkandung dan termeterai.

Kerajaan beritahu apa subsidi yang diberi untuk rakyat dan banyak benda kita bergantung kepada subsidi. Contohnya seperti bapa awaklah, selagi dia berniaga dan dapat untung dia akan beri RM5 ribu setiap bulan dan setelah 20 tahun dia sudah tua, tidak mampu lagi untuk mengusahakan perniagaan maka dia beri RM1,000 sahaja sebulan. Subsidi samalah seperti ini kalau diibaratkan.

***Dalam harga barang keperluan yang semakin naik sekarang ini, ditambah lagi dengan alasan pada tahun hadapan, tol dan minyak akan dinaikkan lagi, bagaimana FOMCA memainkan peranan dalam kehidupan rakyat di masa akan datang misalnya dari segi kuasa beli, untuk mendapatkan rumah, bangunan dan sebagainya?***

FOMCA telah memberitahu kerajaan agar ditubuhkan Suruhanjaya Harga. Suruhanjaya Harga ini adalah penting sebab sebelum satu-satu barang itu naik, kerajaan dan pengguna perlu berbincang terlebih dahulu. Misalnya seperti harga gula sudah 20 tahun tidak naik. Jadi naiklah 10 sen atau 20 sen setiap lima tahun sekali mengikut keadaan dan apa yang terkandung dalam pasaran. Kita juga beritahu rakyat, contohnya alternatif untuk memasak di rumah, bawa bekal dan sebagainya. Awak juga boleh buat supaya ekonomi tidak terancam. Kalau semua kerajaan kena bagi, susahlah sebab tiada satupun negara dalam dunia boleh buat perkara seperti itu.

***Walaupun rakyat menerima kesusahan atas kenaikan harga barang, tol, minyak dan sebagainya tetapi tidak ramai rakyat yang memberi sokongan setiap kali diadakan demonstrasi atau perhimpunan. Kalau adapun hanya segelintir sahaja yang melakukannya. Melihat keadaan***



*itu, isu-isu yang timbul seperti tidak penting bagi mereka. Apa komen Datuk dalam hal ini?*

Kita mempunyai golongan kelas menengah yang ramai lebih kurang 60 peratus tetapi 20 peratus adalah golongan yang kaya raya. Jadi golongan 60 peratus ini selagi mereka mendapat keperluan asas, boleh membayar dan menikmati keperluan pengangkutan awam dan sebagainya, dia tidak akan melakukan demonstrasi, baling batu atau menghadiri perhimpunan. Kalau semua sudah ada, mengapa rakyat mahu menghancurkan apa yang telah sedia ada. Kita bukannya seperti negara Indonesia, Myanmar dan sebagainya. Negara kita mempunyai kelas menengah yang paling tinggi di dunia, penggunaan kad kredit kita terlalu tinggi, makan ayam bagi individu satu bulan juga paling tinggi di duma.

*Betulkah pasaran kita ini telah dikuasai oleh golongan kapitalis?*

Ya memang. Saya rasa kita belum dikuasai sepenuhnya sebab semua ini bergantung kepada dasar-dasar kerajaan. Seperti yang saya katakan tadi, dasar pertanian kerajaan harus ubah. Itu yang utama. Kemudian kerajaan harus pastikan bahawa tak ada orang yang memonopoli semua.

*Selain menjalankan kempen bagi menyedarkan pengguna, apa lagi cara yang FOMCA dilakukan bagi mendidik pengguna?*

Kalau boleh lihatlah laman FOMCA bagaimana cara-cara menjimatkan air, cara-cara menjimat elektrik dan bagaimana kita merancang ekonomi. Kita juga perlu melihat bagaimana cara-cara untuk menjadi pengguna yang bijak, bagaimana cara melayan suami dengan cara yang baik, bagaimana cara untuk senyum selalu dan bagaimana untuk memasukkan berita dan rencana dalam semua surat khabar, program tv, radio dan sebagainya.

Tetapi akhirnya perlindungan pengguna yang terbaik adalah perlindungan diri sendiri. Kita tidak boleh mengharap kerajaan hendak memberi semua. Tidak ada kerajaan dalam dunia ini yang boleh menyediakan untuk semua. Misalnya kalau 10 ke 20 tahun lagi orang tidak mahu berkahwin, takkan

kerajaan akan paksa orang untuk berkahwin. Kalau orang tidak mahu anak, takkan kerajaan nak paksa supaya dia dapat anak. Kita kena terima hakikat, dunia telah berubah, peredaran berlaku.

*Sebelum mengundurkan diri, boleh Datuk terangkan apa aktiviti-aktiviti dan perkembangan terkini FOMCA?*

Aktiviti FOMCA sejak lima tahun kebelakangan ini mendidik di peringkat akar umbi dan anak-anak kita bermula dari tadika hingga tingkatan lima. Mereka ini kita ajar sebab merekalah pewaris generasi yang akan datang. Sebab kita telah melakukan banyak pembaziran yang telah dilakukan oleh pengguna. Jadi kita boleh mengurangkan pembaziran, kita boleh mengurangkan kos dan sebagainya. Sebab semua permasalahan yang wujud di dunia hari ini adalah disebabkan oleh aktiviti-aktiviti manusia. Misalnya aktiviti pembalakan, pergondolan bukit berlaku. Bila bukit gondol, banjir kilat berlaku. Kerana aktiviti-aktiviti ini hujan tidak mahu turun.

Dalam hal ini FOMCA akan menekankan lebih kepada perihal pendidikan. Bagaimana nak baca label, bagaimana nak pastikan paras oksigen tulen dan sebagainya. Apa sahaja diberitahu kepada kami tentang kepenggunaan, kita sedia membantu.

*Siasah*

*21-27 Oktober 2007*

## RUANGAN PUSAT KHIDMAT ADUAN PENGGUNA NASIONAL (NCCC)



No. 1D-1, Bangunan SKPPK,  
Jalan SS9A/17,  
47300 Petaling Jaya, Selangor  
Tel : 03-7877 9000  
Faks : 03-7874 8097  
Emel : [nccc@eraconsumer.org](mailto:nccc@eraconsumer.org)  
[www.eraconsumer.org](http://www.eraconsumer.org)

**ADIL ● PROFESIONAL ● BERKESAN**

## 8 Hak Asas Kita

- Hak Untuk Mendapat Keselamatan
- Hak Untuk Mendapat Maklumat
- Hak Untuk Mendapat Kemudahan Asas
- Hak Untuk Menyuarakan Pendapat
- Hak Untuk Mendapat Gantirugi
- Hak Untuk Membuat Pilihan
- Hak Untuk Mendapatkan Pendidikan Pengguna
- Hak Untuk Mendapat Alam Sekitar Yang Sihat

## Profil FOMCA

Gabungan Persatuan-Persatuan Pengguna-Pengguna Malaysia atau nama akronimnya, FOMCA merupakan sebuah organisasi bukan kerajaan yang bergerak secara sukarela dan tidak mencari keuntungan, bebas daripada isu-isu perkauman, keagamaan dan sebarang parti politik. FOMCA telah ditubuhkan pada 10hb Jun 1973 sebagai persatuan gabungan bagi beberapa persatuan-persatuan negeri pada masa itu. Kini FOMCA mempunyai 15 ahli gabungan di seluruh negara.

Objektif FOMCA adalah untuk menguatkan dan mengukuhkan pertubuhan pergerakan pengguna di Malaysia; meneliti isu-isu serta berjuang untuk hak-hak pengguna; berjuang melalui kuasa beli pengguna yang mengikut keperluan untuk pembangunan yang menjamin sosio ekonomi yang adil dan kualiti alam sekitar yang lebih baik; dan mengkoordinasi dan menjadi badan perunding bagi organisasi pengguna di Malaysia.

Untuk mencapai objektif tersebut, FOMCA menjalankan pelbagai program pendidikan kepenggunaan dan menerbitkan risalah untuk kesedaran pengguna; bertindak memberi perlindungan kepada pengguna di semua peringkat; menyebarkan maklumat kepada pengguna; dan mengkoordinasikan tindakan pengguna melalui kempen dan sebagainya.

Falsafah FOMCA adalah untuk mewujudkan suasana dan sifat berdikari di kalangan pengguna, dengan merealisasikan moto "Perlindungan Paling Berkesan Adalah Perlindungan Kendiri."



### Gabungan Persatuan-Persatuan Pengguna-Pengguna Malaysia (FOMCA)

No. 1D-1, Bangunan SKPPK, Jalan SS9A/17,  
47300 Petaling Jaya, Selangor Darul Ehsan, Malaysia  
Tel: 03-7876 2009, 7875 6370/62 Faks: 03-7877 1076  
Emel: [fomca@fomca.org.my](mailto:fomca@fomca.org.my)  
Laman Web: [www.fomca.org.my](http://www.fomca.org.my)

ISBN 978-9-8340315-9-6

